

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 2-fevral, shanba № 9 (15647)

Navqiron avlod so'zi

Куч-ғайратимиз имкониятимизга яраша

Юртимизда ёшларга кенг эътибор қаратилляпти. Яқинда Тошкент шаҳрида ўтказилган «Ўзбекистон Республикасида ёшлар сиёсатини амалга оширишнинг долзарб масалалари» мавзuidaги республика илмий-амалий анжумани ишини кузатиб бунга яна бир қарра амин бўлдим.

Аслида, ёшлар масаласи ҳар қандай давлат диққат-эътиборидаги масала ҳисобланади. Айниқса, дунёда глобаллашув ва интеграция жараёнлари чуқурлашиб бораётган ҳозирги шароитда у янада долзарб аҳамият касб этган.

Мустақиллик йилларида мамлакатимизда таълим соҳасида қанчалик муҳим ўзгаришлар рўй берганини кўриб ич-ичимдан суюнаман. Чунки ўзим ўқитувчиман.

Касбий фаолиятимни мактабда «Камолот» ЁИХ бошланғич ташкоти етакчилигидан бошлаганман. Ҳаракатнинг барча лойиҳаларида доимо фаол қатнашардим. Таъбир жоиз бўлса, менинг ижтимоий фаол шахс бўлиб етишимизда «Камолот»нинг алоҳида ўрни бор.

Ёш ўқитувчи сифатида мактабда иқтисод фанидан дарс ҳам бердим. 2006 йилда «Йилнинг энг яхши фан ўқитувчиси» республика танловида ғолиб бўлдим. Шу йили «Ўзбекистон Республикаси Халқ таълими аълочиси» кўкрак нишони билан тақдирландим.

Ҳаётимдаги энг унутилмас воқеа эса 2007 йилда рўй берди. Мен муҳтарам Президентимиз билан бевосита учрашиш бахтига муяссар бўлдим. Тошкент вилояти фаоллари йиғилишида сўзга чиқиб, Юртбошимизга барча ёш ўқитувчилар, зиёлилар, ёшлар номидан таълим соҳасида амалга оширилаётган ислохотлар, яратилаётган шароитлар учун миннатдорлик изҳор этдим.

Айни пайтда мен коллеж директори сифатида бўлғуси кадрларнинг сифат даражасига, касбий тайёргарлигига кўпроқ эътибор қаратяман. Албатта, бу йўлда ҳали кўп нарсаларни ўрганишим, тажриба орттиришим керак. Лекин давлатимиз томонидан бизга шу қадар юксак ишонч билдирилаётган экан, Ватанимиз равнақи йўлида ҳар қанча меҳнат қилсак арзийди.

Обод турмуш йилида ниятларимиз бундан-да улғу. Коллежимизни тумандаги энг обод масканлардан бирига айлантиришни мақсад қилиб кўйдик. Ҳозир коллежимиз худудида 310 туп арча кўчати экилди. Баҳор ойларида яна икки минг туп ҳар хил кўчатлар экишни режалаштирганмиз. Токи коллеж ёшларга нафақат таълим-тарбия, балки маънавий қувват берадиган даргоҳга ҳам айлансин.

Азиз ҚЎШБОЕВ,
Оққўрғон ижтимоий-иқтисодиёт ва хизмат кўрсатиш касб-ҳунар коллежи директори, «Ўзбекистон белгиси» кўкрак нишони соҳиби

Истиқлол фарзандлари



Сардор Муллажонов фотокolleжи

Иқтисодиётда инновацион тараққиёт

Kun yangiligi

Г.В.Плеханов номидаги Россия иқтисодиёт университетининг Тошкент шаҳридаги филиалида 26-халқаро Плеханов ўқишлари ташкил этилди.

Мазкур нуфузли илмий-амалий анжуман юртимизда 1997 йилдан буён ўтказиб келинмоқда. Унинг асосий мақсади жаҳон иқтисодиёти ҳамда миллий иқтисодиётларда рўй бераётган ўзгаришларни, юртимизда иқтисодиёт соҳаси ва унинг қатор тармоқларининг ривожланиш динамикасини таҳлил этиш, бизнес муҳитини янада ривожлантириш, шунингдек, кичик бизнес ва хусусий тадбиркорлик субъектлари фаолияти-

ни такомиллаштиришга оид амалий таклифларни ишлаб чиқишдан иборат.

Халқаро анжуман ўз ичига қамраб олган мавзулар кўлами анча кенг. Жорий йилда халқаро Плеханов ўқишлари доирасида жаҳон иқтисодиётининг бугунги ҳолатидан тортиб миллий иқтисодиётлардаги инновацион тараққиёт, меҳнат бозори ва ижтимоий сиёсат, молия-банк ва молия-кредит тизимлари, тадбиркорлик фаолияти, аграр сектор

ва ишлаб чиқариш соҳасини ривожлантириш каби мавзулар муҳокама этилди. Алоҳида урғу иқтисодий фан ва таълимга инновацияларни жорий этиш, уларнинг ўзаро интеграциясини кучайтириш, иқтисодий илм-фандаги янги муаммоларни кўтариб чиқиш ва ечимини топиш масалаларига қаратилди.

— Халқаро Плеханов ўқишларининг ўзига хослиги шундаки, мазкур анжуманда соҳанинг етук олимлари, давлат ҳамда бизнес тузилмалари вакиллари билан бир қаторда, ёш олим ва тадқиқотчилар, талаба ва магистрантлар ҳам ишти-

рок этиб, иқтисодиётнинг долзарб масалалари бўйича фикр алмашиш, ўз таклифларини билдириш имконига эга, — дейди Г.В.Плеханов номидаги Россия иқтисодиёт университетининг Тошкент шаҳридаги филиали директори Қаландар Абдурахмонов. — Бежиз эмаски, Плеханов ўқишларининг иккинчи куни айнан ёшлар илмий-амалий конференцияси сифатида ташкил этилди. Қолаверса, анжуманга бир қатор хорижий давлатларнинг дипломатик корпус вакиллари ҳам таклиф этдик.

(Давоми 2-бетда)

Муҳокамада етакчилар фаолияти



Мамлакатимиздаги барча олий таълим муассасаларида «Камолот» ёшлар ижтимоий ҳаракатининг бошланғич ташкилотлари ташкил этилган. Афсуски, барча бошланғич ташкилотлар етакчиларининг фаолиятини қониқарли деб бўлмайди. Улар орасида номигагина сайланган, ўз масъулиятини тўлақонли англаб етмаётганлар ҳам йўқ эмас.

Олий ва ўрта махсус таълим вазирлиги, Ўрта махсус, касб-хунар таълими маркази ва «Камолот» ЁИХ Марказий Кенгашининг «Ўзбекистон «Камолот» ёшлар ижтимоий ҳаракатининг олий ва ўрта махсус, касб-хунар таълими муассасаларидаги бошланғич ташкилотлари фаолиятини янада такомиллаштириш тўғрисида»ги қўшма қарори эса, бундай камчиликларни бартараф этишга қаратилган. Ҳаракатнинг Тошкент шаҳар кенгаши қарор ижросини таъминлаш ва бошланғич ташкилотлар етакчиларининг билими, дунёқараши, вази-фасига бўлган масъулиятини ошириш мақсадида махсус ўқув семинарини ўтказмоқда. «Камолот» ЁИХ Марказий Кенгаши қошидаги «Етакчи» ёшлар марказида олиб борилаётган ушбу семинарда пойтахтимиздаги 32 та олий таълим муассасасидаги бошланғич ташкилотлар етакчилари иштирок этмоқда.

Жорий йилнинг 31 январидан бошланган семинарнинг биринчи кунидан бошланғич ташкилотлар етакчиларига «Камолот» ЁИХ мақсад ва вази-фалари, Ҳаракат тизимларида ишни жамоавий асосда юриштиш, бошланғич ташкилот кенгаши ва унинг ваколатлари, «Камолот» стипендияси ва «Камолот» таълим гранти танловларини ташкил этиш ҳамда ўтказиш механизми тўғрисида маълумотлар берилиб, ўқув машғулоти олиб борилди. Аслида, ушбу мавзуларни ҳар бир етакчи бошланғич ташкилот етакчиси этиб сайлангандан билиши зарур. Бироқ ҳар ким ҳар хил тушунчага эга. Бундай семинарларда эса, тушунчалар умумлаштирилиб, қилинаётган ва қилиниши зарур бўлган ишлар муҳокама этилади, таклифлар билдирилади. Бу янги сайланган етакчилар учун ҳақиқий билим ва тажриба майдони ҳисобланади. Муҳиддин Нуриддинов ҳам шундай етакчилардан. У 2012 йил

сўнгида Тошкент шаҳридаги Сингапур менежментни ривожлантириш институтида ташкил этилган бошланғич ташкилотга етакчи этиб сайланди.

— Мактаб ва коллежда «Камолот»нинг турли йўналишларида фаолият юритганим боис, бошланғич ташкилот етакчиси сифатида ишлаш қийинчилик туғдирмаяпти, — дейди Муҳиддин Нуриддинов. — Ушбу семинар янги сайланган етакчилар учун яхши кўмакчи бўлади. Кўпинча ички тадбирлар билан чекланиб қоляпмиз. Шунинг учун бошқа институтлар билан ҳамкорликда янги лойиҳаларни амалга оширишимиз зарур, деб ўйлайман. Узаро ҳамкорликни кучайтирсак, ҳам тажриба алмашамиз, ҳам қизиқарли ва оммабоп лойиҳаларни ўтказиш мумкин. Биз Тошкент халқаро Вестминстер университети ва Жаҳон иқтисодиёти ва дипломатия университети билан ҳамкорликда талаба тенгдошларимизнинг ақлий салоҳиятини оширишга қаратилган «Дебат» клуби ва нотиклик санъати тўғраги фаолиятини яхшилашга интиляпмиз. Институтимизда ашула айтишга ва бастакорликка қизиқувчи ёшлар кўп. Шу боис «Талант-шоу» дастурини ўтказиш ниятидамиз. Семинар

«Kamolot» loyihalari

давомида яна кўплаб лойиҳаларни ўйлаб топамиз.

Ёшлар сиёсатини амалга ошириш, ҳарбий талабалар билан ишлаш ҳам етакчилар зиммасида. Семинарнинг иккинчи куни соҳа мутахассислари бошланғич ташкилотлар етакчилари учун «Ҳарбий қисмлар тавсияномаси билан ўқишга қабул қилинган талабалар билан ишлашнинг самарали усуллари», «Ўзбекистон Республикасида ёшлар сиёсатини амалга оширишнинг долзарб масалалари» ҳамда «Ёшлар билан ишлашнинг психологик йўллари» каби мавзулардаги маърузалари билан қатнашди. Мутахассисларнинг бундай маърузалари етакчиларнинг билим-тажрибасини янада оширишга хизмат қилади. Бу ҳақда Ўзбекистон давлат санъат ва маданият институти бошланғич ташкилоти етакчиси Тўлқин Жўраев шундай деди:

— Семинарда етакчи учун зарур бўлган маълумотларни оляпмиз. Бу эса, келгуси иш фаолиятимизни самарали ташкил этишга хизмат қилади. Айниқса, ёшлар билан ишлашдаги психологик йўллар маърузаси менда катта қизиқиш уйғотди. Чунки ҳар соат, ҳар куни ёшлар билан ишлаймиз. Бунда инсон психологиясини билиш муҳим аҳамиятга эга. Семинарда бошқа етакчилар билан мулоқотда бўлиб, билим ва тажрибалар алмашаяпмиз, янги лойиҳалар ҳамда бошланғич ташкилотлар фаолият самарадорлигини оширишга қаратилган таклифлар муҳокама этиляпти.

Бугун ушбу семинарнинг охириги куни. Унда «Камолот» ЁИХ томонидан олий таълим муассасаларида амалга оширилаётган лойиҳалар, бошланғич ташкилотнинг намунавий иш режаси ишлаб чиқилади. Шунингдек, семинар иштирокчиларига гувоҳнома топширилиб, фаол иштирок этган бошланғич ташкилотлар етакчилари тақдирланади.

Рустам ЮСУПОВ,
«Turkiston» муҳбири.
Сардор Муллажонов олган сурат

«Kamolot» ko'zgu

Қарши муҳандислик иқтисодиёт институтида битирувчилар орасида тадбиркорлик фаолиятини бошламоқчи бўлган талабалар учун «Ёш тадбиркор — тараққиёт пойдевори» мавзuida семинар-тренинг ташкил этилди. «Камолот» ЁИХ вилоят кенгаши ташаббуси билан амалга оширилган ушбу семинарда вилоят савдо-саноат палатаси, Марказий банкнинг вилоят бош бошқармаси, вилоят «Қишлоқ қурилишбанк» ОАТБ, вилоят «Ипотекабанк» АТИБ, вилоят «Агробанк» ОАТБ, вилоят «Микрокредитбанк» ОАТБнинг масъул ходимлари қатнашди.

Яхши бизнес режалар тавсия этилди

Семинар аввалида Ҳаракатнинг вилоят кенгаши қошидаги «Ёш тадбиркор» консультатив маркази раҳбари Маҳлуё Абдурахмонова ўтган йилда ҳамкор ташкилотлар билан биргаликда имзоланган битимларга асосан, ёш тадбиркорларга кўрсатилган амалий ёрдам ва ажратилаётган имтиёзли кредитлар тўғрисида талабаларга маълумот берди. Сўнгра тадбиркорлик фаолиятини бошлашда фойдаланиладиган қонуний-меъёрий ҳужжатлар тўғрисидаги маълумотлар слайд ва кўргазмалар воситалар ёрдамида тушунтириб ўтилди.

Семинар сўнгида иштирокчилар орасидан тадбиркорлик фаолиятини бошламоқчи бўлган ёшларга амалий ёрдам кўрсатиш мақсадида уларнинг рўйхати шакллантирилди.

Вилоятда ёшлар билан бирга, хотин-қизларни ҳам тадбиркорликка кенг жалб этиш борасида қатор учрашувлар ўтказилмоқда. Шундай тадбирлардан бири Қарши шаҳридаги «Кунчиқар» маҳалласида бўлиб ўтди. «Тадбиркорлик — обод турмуш гарови» деб номланган давра суҳбатида «Камолот» ЁИХ, тижорат банклари ходимлари иштирок этди. Тадбирда тадбиркорлик билан шуғулланиш истагида бўлган хотин-қизларнинг бизнес режалари тайёрланиб, «Микрокредитбанк» ОАТБ Қарши шаҳар филиалига имтиёзли кредитлар бериш учун тақдим этилди.

Акрамжон САФАРОВ,
ЎЗМУ талабаси

Иқтисодиётда инновацион тараққиёт

(Давоми, боши 1-бетда)

Анжуман ялпи мажлиси йиғилишида Россия иқтисодиёт университетининг проректори, профессор Анатолий Шишкин, Россия Федерациясининг Ўзбекистондаги фавқулудда ва мухтор элчиси жаноб Владимир Тюрденев, Ўзбекистон Савдо-саноат палатаси раиси Алишер Шайхов, Фанлар академияси академиги Саидахорр Гуломов ва бошқалар сўзга чиқишди. Йиғилишда, шунингдек, вазирлик ва идоралар раҳбарлари, Малайзия, Индонезия ва Хитой Халқ Республикасининг мамлакатимиздаги элчилари, таниқли иқтисодчи олимлар ва мутахассислар иштирок этишди. Таъкидланганидек, жаҳон иқтисодиёти мураккаб даврни бошидан кечираётган айни пайтда мамлакатлар олдида мустақил тараққиёт йўлини белгилаш, ички

иқтисодиётни мустаҳкамлаш ва ривожлантириб бориш вази-фаси турибди. Ўзбекистон мазкур масалада ўз қатъий позициясига эга. Биз танлаган йўл жамиятни модернизациялаш ҳамда иқтисодий барқарорликка эришиш мақсадига қаратилган. Зеро, мамлакатимизни жаҳоннинг энг ривожланган давлатлари қаторига олиб чиқиш олдимизда турган энг катта ва муҳим вази-фадир. Бу борада юртимизда аниқ ва тизимли чора-тадбирлар комплекси амалга ошириляётганини ва бунинг натижасида Ўзбекистон иқтисодиёти жадал суръатлар билан ўсиб бораётганини анжуман меҳмонлари алоҳида қайд этишди. Жумладан, сўнги таҳлилларга кўра, дунёнинг кўплаб мамлакатларида давлат қарзининг ортиб бориши кузатиляётган бир шароитда давлатимиз қарз ҳажмининг улуши нисбатан паст даражада (ялпи ички маҳсу-



лотга нисбатан 16 фоиздан ошмайди) сақланиб, бу кўрсаткич халқаро мезонлар бўйича ўртачадан кам деб баҳоланмоқда.

Халқаро олмий-амалий анжуман ўз иштини олтита шўбада давом эттирди. Шўба мажлисларини таниқли олимлар

ва мутахассислар олиб боришди. Ҳар бир шўба доирасида анжуман иштирокчилари ҳозирги даврнинг долзарб иқтисодий муаммолари, Президентимиз Ислон Каримов томонидан илгари сурилган Мамлакатимизда демократик ислохот-

ларни янада чуқурлаштириш ва фуқаролик жамиятини ривожлантириш концепциясида белгиланган устувор масалалар юзасидан фикр алмашишди.

Анжуман сўнгида шўбаларда тўпланган таклифлар жамланиб, 26-халқаро Плеханов ўқишларининг якуний резолюцияси қабул қилинди. Халқаро анжуманга тақдим этилган энг яхши тезислар муаллифлари фахрий дипломлар билан тақдирланди.

Г.В.Плеханов номидаги Россия иқтисодиёт университети иқтисодиётнинг кенг тармоқлари учун замонавий кадрлар: иқтисодчилар, молиячилар, топ-менеджерлар, давлат идоралари ва йирик хусусий корхоналар учун маркетинглар тайёрловчи нуфузли таълим муассасаси ҳисобланади. Тошкент шаҳрида университет филиали 1995 йилда очилган. Ҳозир бу ерда ўрта факультет фаолият кўрсатмоқда. Шу кунгача Г.В.Плеханов номидаги Россия иқтисодиёт университетининг Тошкент шаҳридаги филиалини 2300 нафарга яқин талаба ва магистр тармоқлади.

Наргиза БАҲОДИРОВА,
«Turkiston» муҳбири

Хар бир дақиқаси эсда қолди

Мамлакатимизда оила деган тушунча юксак қадрлиниб, муқаддас даргоҳ сифатида улуғланмоқда. Олий таълим муассасаларида маънавият кунларининг ўтказилиши эса, ёшлар маънавиятини оширишга қаратилган. Низомий номидаги Тошкент давлат педагогика университетиде ташкил этилган «Кўнгиллар обод бўлсин» мавзудаги маънавий-маърифий тадбир ҳам талабаларнинг маънавий оламини бойитишга, эзгулик сари етаклашга қаратилди. «Камолот» ЁИХ Марказий Кенгаши ва Ўзбекистон Ёзувчилар уюшмаси ҳамкорлигида ўтказилган ушбу тадбирда Олий Мажлис Сенати аъзоси, Ўзбекистон халқ шоири Иқбол Мирзо, «Камолот» ЁИХ Марказий Кенгаши раисининг биринчи ўринбосари Феруза Муҳаммаджонова, университет ўқитувчилари, ёш ижодкор ва талабалар қатнашди.

Тадбирни Тошкент давлат педагогика университетининг маънавий-ахлоқий ва тарбия ишлари бўйича проректори Одина Жамолдинова кириш сўзи билан очиб, Обод турмуш йили муносабати билан ташкил этилган ушбу тадбир ҳақида

тўхталиб ўтди. Шундан сўнг университетнинг ўзбек адабиёти кафедраси доценти Ислон Ёқубов «Ижоднинг сирли олами» мавзуда бугунги ўзбек шеъриятининг жозибаси ва унда Иқбол Мирзо шеъриятининг ўрни ҳақида сўз юритди.

Тадбирда Ўзбекистон Ёзувчилар уюшмасининг «Ижод» фонди томонидан олиб борилган ижобий ишлар таъкидланиб, йигирма минг нусхада чоп этилган ёш ижодкорларнинг биринчи китоби тақдироти бўлиб ўтди ҳамда уларнинг ижод намуналаридан тингланди. Ўзбекистон халқ шоири Иқбол Мирзо ўқиган шеърлар тадбир иштирокчиларида катта қизиқиш уйғотди. Адабиётга, шеъриятга ошно талабаларнинг шоирга жўр бўлиб кўшилиши тадбирга янада кўтаринкилик бағишлади.

— Ўтган йили Ўзбекистон Ёзувчилар уюшмасининг «Ижод» фонди кўмагида «Кўзларимдаги дунё» номли илк китобимни чиқардим, — дейди Ўзбекистон миллий университети журналистика факультети магистранти Бобур Элмуродов. — Йигирма минг нусхада чоп этилган ушбу

тўпلامга Ватан, она, табиат, севги-муҳаббат, ёшлик каби мавзуларда олтишта шеърим киритилган. «Ижод» фондининг мен каби ёш ижодкорларга кўрсатаётган бундай амалий кўмагидан миннатдорман. Бугунги учрашув эса, ижодкорлар сафини янада кенгайтиради.

Тадбир давомида «Камолот» ЁИХ Марказий Кенгаши раисининг биринчи ўринбосари Феруза Муҳаммаджонова Ҳаракат томонидан ёш истеъодларни қўллаб-қувватлаш борасида олиб борилган ишлар хусусида тўхталиб, Мустаҳкам оила йилида Ўзбекистон Ёзувчилар уюшмаси билан ҳамкорликда «Оила — менинг қутлуғ боғим» номли ёш истеъодларнинг шеърий тўплами нашр этилганини айтди ва унга киритилган ёш шоир Рустам Мирвоҳиднинг «Илтимос, суюнманг!» шеърини ўқиб эшиттирди.

— «Оила — менинг қутлуғ бо-

ғим» номли ёшлар баёзига «Ватан», «Ўзим ҳақимда» номли шеърларим киритилган, — дейди Ўзбекистон давлат жаҳон тиллари университети талабаси Кумуш Усарова. — Шеърий тўпладан республикамизнинг турли ҳудудларида ижод қилаётган ўттизга яқин тенгдошимнинг шеърлари ўрин олган. Биз, ёш ижодкорларни қўллаб-қувватлаётган Ўзбекистон Ёзувчилар уюшмаси ва «Камолот» ёшлар ижтимоий ҳаракатидан мамнунмиз.

Тадбир Шўхрат Дарё ижросидаги куй-кўшиқ ва талабаларнинг «Ёшлик — муҳаббат фасли» номли шеърий композициясига уланиб кетди. Эзгуликни мадҳ этувчи бундай тадбирлар кўнгилларни обод этади. Обод кўнгиллар эса эзгулик уруғини ёйишга хизмат қилади.

Рустам ЮСУПОВ,
«Turkiston» мухбири

Тенгдошлар ишончини қозонган етакчи

Сурхондарёлик Шерзод Суёновни вилоятдаги фаол тенгдошлари яхши танийди. Ҳаракатнинг вилоят кенгашидагилардан у ҳақда сўрасангиз ҳам фақат яхши фикрларни эшитасиз. Сабаби, ўн уч ёшида «Камалак» болалар ташкилотига аъзоликка қабул қилинган Шерзод ташаббускорлиги ва жамоат ишларидаги фаоллиги билан ўша пайтлардаёқ тенгқурлари ва «Камолот»чилар ҳурмати қозонганди. Денов туманидаги 17-давлат ихтисослаштирилган мактаб-интернатда ўқиб юрган кезларида ҳам дарсдан бўш вақтини Ҳаракатнинг туман кенгаши қошидаги турли тўғарақларда ўтказар, тенгдошлари орасида бўлиш, улар билан фикрлашиш, муаммолари ечимини биргаликда излаш Шерзод учун мароқли машғулот эди.



Йиллар инсонни тоблаши рост. «Камолот» ёшлар ижтимоий ҳаракати фаолиятидаги кўп йиллик иштироки Шерзодга тенгдошлари билан ишлаш санъатини ўргатди. У ўзининг Ҳаракат тадбирларидаги фаоллиги билан чекланиб қолишни истамасди. Энди Шерзодни «Келажақ овози» ёшлар ташаббуслари марказида ҳам тез-тез учратиш мумкин эди. Бир неча йил ўтиб, вилоятдаги Иқтидорли ёшлар кенгашига етакчи сайлаш зарурати пайдо бўлганида, тенгдошлари иккиланмай унинг номзодини кўрсатишди. Шундан буён йигирма ёшли етакчи тенгқурлари орасида.

Етакчининг нималар билан машғул-

лиги, ёшлар орасидаги фаолиятига қизиқиб, Шерзодга бир неча саволлар бердик.

— Фаолиятимиз мақсади тенгдошларимизни ўйлантираётган муаммолар ечимига, уларни соғлом турмуш тарзига ундаш, маънавий-маърифий тадбирлар ёрдамида дунёқараши кенгайишига кўмаклашиш каби бир қанча ёшлар масалаларига йўналтирилган. Бу мақсаддан оғишмай иш олиб боришга ҳаракат қилаймиз. — деди Шерзод Суёнов. — Яқинда «Ёшлар ёшларга» акциясини ўтказдик. Унинг доирасида вилоятимиздаги ўн олтирта ўрта махсус таълим масканида ўн олти мавзуда семинар-тренинглар ташкил этдик. Бизни қувонтиргани машғулотлар сўнггида ёшлар бизга миннатдорлик билдириб, шундай тадбирларни тез-тез ўтказишимизни сўрашди.

Айни пайтда Шерзод Суёнов Термиз давлат университети талабаси. 2011 йилдан «Келажақ овози» ЁТМ вилоят бўлими менежери. Иқтидори, жамоат ишларидаги фаоллиги боис, 2011-2012, 2012-2013 ўқув йилларида изма-из икки марта «Ўзбекистон маданияти ва санъати форуми» ва «Меҳр нури» жамғармаларининг «Таълим грантлари» дастури қолиби бўлди.

Ёшлик шижоати кўп ишга қодир. Фақат бу қудратни айримлар сезмайди ёки ундан яхши фойдаланмайди. Шерзод бундан мустасно. У доим янги ташаббуслар иштиёқи билан яшайди.

Хайриддин МУРОД,
«Turkiston» мухбири

«Turkiston» мухбири

Республика «Меҳр ва мурувват» жамоат фонди бошқарув кенгашининг 2012 йил 17 ноябрдаги буйруғига асосан, 2012-2013 ўқув йилидан бошлаб академик лицей ва касб-хунар коллежларининг 3-босқичида таҳсил олаётган кам таъминланган оилаларнинг иқтидорли фарзандларини ва ногирон болаларни моддий қўллаб-қувватлаш мақсадида «Меҳр ва мурувват» фонди стипендияси жорий этилган эди.

Янги стипендиянинг илк қолиби

Ушбу стипендия бир ўқув йили давомида (сентябрь-июнь ойларида) ҳар ой юз минг сўм миқдориде белгиланган. У «Меҳр ва мурувват» жамоат фондининг ҳудудий филиаллари томонидан ҳар бир ҳудуддан аёло баҳоларга ўқийдиган, ижодий фаолият билан шуғулланадиган, бошқаларга намуна ва ибрат кўрсата оладиган 3-курсда ўқийдиган жами ўн тўрт нафар ўқувчига берилади. Навоий вилояти ўрта махсус, касб-хунар таълими бошқармаси ҳамда Республика «Меҳр ва мурувват» фонди вилоят филиали ҳамкорлигида Навбахор қишлоқ хўжалиги ва хизмат кўрсатиш касб-хунар коллежида ташкил этилган «Иқтидорли ёшлар — келажагимиз пойдевори» мавзудаги тадбирда «Меҳр ва мурувват» фонди стипендиясининг вилоят қолиби аниқланди. Унга кўра, Навбахор қишлоқ хўжалиги касб-хунар коллежининг 3-босқич ўқувчиси Аслиддин Маматов энг юқори балл тўплаб, 2012-2013 ўқув йилининг сентябрь, октябрь, ноябрь, декабрь ойларида тўлаб бориладиган тўрт юз минг сўм стипендиясини қўлга киритди ва фахрий ёрлик билан тақдирланди.

Азизжон ҚОСИМОВ,
Республика «Меҳр ва мурувват» фонди
Навоий вилоят филиали директори



Кўштепа агросаноат касб-хунар коллежи 615 ўринга мўлжалланган бўлиб, айни кунда бу ерда 1 минг 57 нафар ўқувчи беш йўналишда таълим олади. Коллеж педагогик жамоасининг асосий қисмини ёш ўқитувчилар ташкил этади. Уларнинг ўз фанлари бўйича билимларини мустаҳкамлаш, педагогик тажрибаларини ошириш мақсадида устоз-шогирд мактаби ташкил этилган. Ёш ўқитувчиларга математика фанидан Ортиғали Ибрагимов, физика бўйича Набижон Мирзаев, Юлдузхон Шокирова ва биолог Мавлудахон Саминова каби устозлар ўз билим ва тажрибаларини ўртоқлашишяпти.

Нодиржон ЮСУПОВ,
«Turkiston» мухбири

СУРАТДА: тажрибали устоз, математик Ортиғали Ибрагимов ёш ўқитувчилар билан ўз тажрибаларини ўртоқлашяпти.

Қўли гул бегойимлар

Shunday markaz bor

«Камолот» ёшлар ижтимоий ҳаракати Бухоро вилояти кенгаши қошида фаолият юритаётган «Ёшлар ижтимоий хизматлари» марказидаги «Ёш оила» тикиш-бичиш тўғараги қизиқувчан қизлар ва ёш уй бекаларининг севимли масканига айланган. Қўли гул тикувчилар, изланувчан, ижодкор, янги мода яратувчи дизайнерлар, абрбанд (атлас, шойи каби матоларга гул солиш санъати) усталари тайёрлаб бераётган тўғаракка келсангиз, кўнглингиз яйрайди.

Изланишдан чарчамайдиган қизлар уч ой деганда тикиш-бичиш сирларини ўрганиб, кўнглингиздагидек либосларни тайёрлаб бера оладиган хунар эгаси бўлиб етишади. Бир неча турдаги замонавий механик ва электрон тикув дастгоҳлари, компьютер тикув машинаси, шунингдек, электрон тикув-нусхалаш ва пардозлаш машиналарининг мавжудлиги машғулотларнинг янада қизиқарли ва тезкор кечишини таъминламоқда. Тўғарак жойлашган хона замонавий мебеллар, техник ускуналар билан жиҳозланган.

— Марказга келаётган ҳар бир қиз ва ёш келинчақ ўз ишидан, ўрганганларидан кўнгли тўлсин, деймиз, — дейди биз билан суҳбатда тўғарак раҳбари Феруза Маменова. — Чунки улар бу ерга катта умид билан, хунар урганай, деб келяпти. Уларнинг кўзлаган мақсадларига эришиши учун қўлдан келганча ҳаракат қилаймиз. Улар тўғаракимизда абр-

банд, моделлаштириш, лойиҳалаш, замонавий элита пардалар тикиш, безак ишлари бўйича моҳир усталар бўлиб етишадилар.

Тўғаракнинг фаол аъзоларидан Бодом Камолова, Мафтуна Рўзиева, Фарангиз Сатторова, Гулшан Раҳмонова каби қизлар келгусида ўз касбу корларининг моҳир усталари бўлиб етишишларига шубҳа йўқ. Бундан ташқари, тўғаракнинг кўплаб аъзолари дизайнерлик ва лойиҳалаш йўналишлари бўйича республика танловларида муносиб ўринларга сазовор бўлаётгани ҳам эътиборга молик. Қизларнинг ҳамжиҳатлилиги билан болалар ва меҳрибонлик уйларида тарбияланаётганлар, имконияти чекланган ёшлар, кўп болали оила фарзандлари учун беминнат кийим-кечаклар тикиб етказилмоқда.

Тўғаракда мавжуд беш йўналишда ўртача йигирма беш нафардан аъзолар тўпланишини



назарда тутадиган бўлса, ушбу маскандан ҳар уч ойда бир юз йигирма беш, бир йилда эса беш юз нафар касб-кор эгаси етишиб чиқади. Яқинда мазкур тўғарак фаолиятидаги ижобий натижалар самараси ўлароқ, Бухоро туризм касб-хунар коллежи билан шартнома тузилди. Унга кўра, коллежнинг бир гуруҳ ўқувчилари амалий машғулотларни шу ерда ўтказадиган бўлишди.

Бу, албатта, «Ёшлар ижтимоий хизматлари» маркази қошида ташкил этилган «Ёш

оила» тикиш-бичиш тўғаракнинг жамият ривожига қўшиб келаётган катта ҳиссасидир. Яқинда мазкур тўғарак йўналишларига қўшимча равишда «Ибратли бека» маслаҳат-мунозара клуби фаолияти ҳам йўлга қўйилди. Бунда оила қуриш оstonасида турган қизлар қайноналар, мутахассису руҳиятшўнослар билан учрашиб, ўзбекона урф-одат ва удумлар, қайнона-келин муносабатлари, мустаҳкам оила қуриш борасида маслаҳатлар

олишади. «Ибратли бека» қизларни келинликка, келинларни эса оналикка тайёрлашнинг мўтабар даргоҳи бўлиб қолишига ишонамиз.

Ёш авлод камолоти, қизларнинг жамиятдаги, оиладаги ўрнини юксалтириш мақсадини илгари сурган мазкур тўғарак Ҳаракат атрофида ёшларни янада жипслаштириш йўлидаги муносиб саъй-ҳаракат мевасидир.

Лайло ХАЙИТОВА,
«Turkiston» мухбири

Интеграциялашувда муҳим қадам

Munosabat

Жаҳон миқёсида глобализация ва интеграция жараёнлари давом этмоқда. Бу эса, ўз навбатида, барча соҳаларга таъсир кўрсатиб, жаҳон иқтисодий ривожлантиришга имкон яратади. Демак, айти пайтда хорижий тилларнинг аҳамияти тобора ортиб бораётгани ҳақида ҳам гапириш мумкин. Хорижий тилларни ўрганиш шу тилда сўзлашувчи халқларнинг урф-одатлари, анъана ва маросимлари, мамлакат географияси, ташқи ва ички сиёсати, тарихини ўргатиш вазибаларини ҳам қамраб олади.

Мамлакатимизда хорижий тилларни ўқитиш ва ўрганишга жиддий эътибор берилмоқда. Бу борада ҳукуратимиз, шунингдек, Олий ва ўрта махсус таълим вазирлигининг бир қатор қарорлари қабул қилинган. Уларга биноан, ўқитилаётган фанлар бўйича намунавий дастурлар тузилиб, тажриба-синов учун таълим муассасаларига тарқатилди, бундан ташқари, хорижий тилларни ўқитиш жараёнига масофали таълим, интерфаол таълим, инновацион технологиялар ва бошқа янги педагогик технологиялар жорий этилмоқда.

Тошкент давлат юридик институтида ҳам хорижий тилларни ўқитиш ва ўргатишга асосий эътибор қаратилган. Хорижий тиллар кафедраси томонидан ишлаб чиқилган намунавий дастур лойиҳаси ҳозир республикамиз олий таълим муассасаларида тажриба-синовдан ўтказилмоқда. Таълим жараёни мазкур ишчи дастур асосида олиб

борилиб, талабалар керакли дарслик ва ўқув қўлланмалар билан тўлиқ таъминланган. Шунингдек, талабаларнинг мустақил ишларини мақсадли ва тўғри ташкил этиш учун методик кўрсатмалар ишлаб чиқилган. Институтининг ўзида лингвон кабинетини ташкил этилиб, унда юқори малакали профессор-ўқитувчилар томонидан машғулотлар ўтказиб борилади.

Тошкент давлат юридик институтида талабаларнинг хорижий тилларни ўрганиш бўйича қизиқишларини ҳисобга олган ҳолда иқтидорли талабалардан иборат беш гуруҳ ташкил этилган. Булар — тил ва маданият, таржима назарияси ва амалиёти, мамлакатшўнослик, халқаро сертификатлар ва олимпиада гуруҳлари. Жорий ўқув йилида тил ва маданият, мамлакатшўнослик йўналишлари бўйича гуруҳ аъзолари томонидан бир неча тақдимотлар тайёрланиб, талабаларга намоиш этилди.

Таржима назарияси ва амалиёти гуруҳи томонидан эса бир қанча адабиётлар инглиз тилидан ўзбек тилига таржима қилинди.

Ҳозирга қадар институтидан йигирма нафардан зиёд талаба IELTS, TOEFL тестларидан муваффақиятли ўтиб, халқаро сертификатларга эга бўлишди. Шунингдек, сўнгги йилларда талабаларимиз инглиз ва немис тилларидан республика фан олимпиадасида муваффақиятли қатнашиб, фахрли ўринларни эгаллашмоқда.

Жорий йилда қабул қилинган Ўзбекистон Республикаси Президентининг «Чет тилларни ўрганиш тизимини янада такомиллаштириш чора-тадбирлари тўғрисида»ги қароридан мамлакатимиз таълим тизимида хорижий тилларни ўқитишга қаратилган бир қатор муҳим вазибалар белгилаб берилди. Уларни ўз вақтида сифатли ва тўлиқ бажариш юртимизда рақобатбардош замонавий кадрларни тайёрлаш жараёнига ижобий таъсир кўрсатади, албатта.

Т. САТТОРОВ,
Тошкент давлат юридик институти хорижий тиллар кафедраси мудири, профессор.
Т. АКОБИРОВА,
кафедра доценти

Vatan himoyasi — muqaddas burch

Ёшлигидан кўча-кўйда, ойнаи жаҳон орқали ҳарбийларни кўрган Элмуроднинг уларга ҳаваси келиб: «Катта бўлсам, мен ҳам ҳарбий бўламан», деб қўярди ўзига-ўзи. Улғайгани сари эл-юрт, яқинларини ҳимоя қилиш, тинчлик, осойишталикни сақлаш унинг йигитлик бурчи эканлигини англаб борарди. Ўз орзуси йўлида оғишмай ҳаракат қилди.

Лафзи ҳалол, мақсади олий

Бундан ўн йил аввал — 2003 йилда Элмурод Сурхондарё вилоятининг Узун туманига ҳарбий хизматни ўташ учун жўнаб кетган эди. Бу — унинг орзуси йўлида илк қадам бўлди. Орадан бир йил ўтиб, хизмат муддати якунига етган бўлса-да, хизмат давомидаги дадиллиги, лафзи ҳалол, мақсади олийлиги ҳисобга олиниб, имтиёз асосида қисмда ишлашга олиб қилинди. Ҳарбий билимларини, кўникмаларини янада мустаҳкамлаш мақсадида Сержантлар мактабидан таҳсил олди. Бугун у Термиз шаҳрида ишлаб келмоқда.

Фарзандлари эл осойишталиги йўлида камарбасталигидан қалблари фаҳрга тўлган ота-онаси — Янги-қўрғон туманининг Навкент қишлоғида яшовчи Қозоқжон ва Мавлудахон ўғилларининг тансиҳатлиги учун доимо дуодалар.

— Ўғлим эл-юрт олдида юзимизни ёруғ қилганидан ғурурланаман, албатта, — дейди Қозоқжон Бурҳонов.

Камола ЖўРАБОЕВА,
Наманган вилояти



Биз ўз фарзандларимизнинг бахту саодатини, иқболи ва камолини кўришни истар эканмиз, нафақат оиладаги, балки маҳалла-кўйдаги одамларнинг хатти-ҳаракати ҳам боланинг шаклланиб келаётган соф қалби ва онгига қандай таъсир кўрсатиши ҳақида доимо ўйлашимиз, бу масалада зиммамизда қандай улкан масъулият борлигини унутмаслигимиз зарур.

Ислом Каримов

(«Юксак маънавият — енгилмас куч» китобидан)

Юракка йўл қаерда?

Тилимизда мавжуд, гапириш ҳам мумкин бўлса-да, аммо айтишга тилинг боравермайдиган сўзлар бўлади. Масалан, аёлнинг бемехрлиги, отанинг шафқатсизлиги ҳақида гапириш жуда қийин. Бу юрак-юрагимизга сингиб кетган тушунча ва қадриятларга зид бўлгани учун ҳам шундайдир. Худди шу сингари болалар жиноятчилиги, ҳуқуқбузарлиги ҳақида гап кетганда ҳам ичингда нимадир «чим» этиб оғрийдир. Болалардан, ҳали кўнгли тоза ўспиринлардан бундай ишларни кутмайсан, одам. Аммо афсуски, гоҳ-гоҳида ана шундай кўнгилсиз гаплар қулоққа чалинади. Йўқ, бундай ёшда одам боласининг кўлидан ёвузлик келмайди. У ҳали дунёга беғубор кўз билан боқишни билади. Ҳаммани бирдай кўриш, яхши кўрса бирдай яхши кўришга қобил бўлади у. Лекин савол пайдо бўлади: нима учун у ўзининг болалик табиатида зид, дилхира ишларга қўл уради? Бунинг асл сабаблари нимада?

Куйида бу саволларга биргаликда жавоб топишга уриниб кўрамиз.

ИНСОН ҚАЛБИГА ЭНГ ТЎҒРИ ЙЎЛ

Менга Ернинг таянч нуқтасини кўрсатинг, мен уни кўлимда кўтариб тура оламан, деган экан алломалардан бири. Физика нуқтаи назаридан бу гапнинг ҳақиқат ёки муболаға эканини билмаймиз, лекин у жуда кўп мулоҳазаларга туртки бўлган, бу аниқ. Ҳақиқат шуки, биз кўпинча «таянч нуқтани топишда» қийналамиз.

Президентимиз Ислом Каримовнинг «Юксак маънавият — енгилмас куч» китобида инсон қалбига йўл аввало таълим-тарбиядан бошланади, деган ҳикматли сўз бор. Бу фикрнинг нечоғлик ҳақиқат эканлигини англаш учун жуда кўп ўйланиш шарт эмас, атрофга теран назар ташлашнинг ўзи кифоя.

Ўғли уч марта жиноят қилиб, жавобгарликка тортилган онанинг: «Ўғилгинамнинг айби йўқ эди», деганини эшитиб, ёшлик ҳиссиётларим билан ичимда газабланганимни эслайман. Айби йўқ одам бир марта жавобгарликка тортилар, агар жуда «адолат йўқ экан», икки марта тортилар, бу ҳол учинчи марта бўлиши мумкинми, дея қизишганман. Бугун ўйлаб кўрсам, онанинг гапи бениҳоя табиий, ҳар бир ҳарфи, ҳар бир товушигача оналикка йўғрилган экан. Муштипар аёл ўғлини жонидан ортиқ яхши кўргани билан, унга

ўзи, турмуш ўртоғи қандай тарбия берганини мулоҳаза қилиб кўрмагандай эди.

Бугун фарзандининг ким билан дўстлашаётгани, нима билан дўстлашаётганини, мактабда, кўчада, уйда нима билан машғул эканини аниқ биламан, деган ота-она бўлса, бундай ота-онага раҳмат айтиб, кўлини сиқиб қўйиш керак. Жамият орзу қилган инсонлар ана шундай оилаларда камол топаётган бўлади. Аммо эгнига аллатовур либосларни ташлаб, кўча-кўйда тентираб юрадиган, соатлаб ўйин ўйнаб, интернет-кафеларни бой қилаётган ўсмир йигитчаларни, тиззаларини кўз-кўз қилиб, айрим «замонавий» опаларининг изидан бораётган сохта карашмали қизчаларни кўриб, улар уни-ўсаётган хонадонлардаги тарбиявий муҳитнинг соғломлигига шубҳа қиласан, киши.

Ўғил уйга тез-тез кеч келаяптими — сергак ота-она бунинг сабабини дарҳол суриштиради. Болалик ва балоғат ёшининг ўртасида юзага келадиган руҳий-маънавий ўзгаришлар, ўсмирликка хос «гап уқмай қолиш»лар, инжиқликлар, гоҳида бирданига юз кўрсатадиган пўртаналар ақли ота-оналарнинг эътиборидан четда қолмайди. Аслида-ку, аввало, яхши тарбия кўриб ўсган, зиёли ота-оналарнинг фарзандларидан номаъқул хатти-ҳаракатни кутиш ўзи тўғри эмасдай.

Зеро, уларнинг оилаларида барча инсоний фазилатларга, умумбашарий ва миллий қадриятларга ҳурмат руҳи устувор бўлади, албатта.

Мавзуга доир мулоҳаза. Гулноза Мамажонова, Наманган муҳандислик-педагогика институти ижтимоий фанлар кафедраси ўқитувчиси: — Ўғли ё қизига қимматбахо телефон олиб бераётган ота-она унга етарли тарбия ҳам бера олиши керак. Умуман, бир инсоннинг вояга етиши жуда кўп омилларга боғлиқ. Мактаб, коллеж, институт — бу тарбияни ривожлантирувчи масканлар, унинг пойдевори эса, оилада қўйилади. Мени ҳайрон қолдирадигани айрим ота-оналар ишим кўп, вақтим кам, деб болаларга етарли вақт ажратмайди. Фарзанд ўзлигини англаб етганда, ўзининг шахсий қарашлари — бу қарашларнинг тўғри ёки нотўғри эканлиги бошқа масала — шаклланиб бўлганда бериладиган тарбияни беҳуда уриниш деб баҳолаша бўлади. Ҳар қандай замонда, ҳар қандай шароитда ота-она болага етарли тўғри тарбия бериши шарт. Бу мамлакатимиз Конституциясида ҳам белгилаб қўйилган-ку.

БУРЧНИ ҲИС ҚИЛИШ

Ҳар биримизнинг ўзимизга яраша муаммоларимиз бор. Бу табиий. Уларсиз одам ҳеч нарсага интилмаган, бинобарин, «тирноғидан сочи-

нинг учигача» ҳаракатсизлик касалига чалинган бўларди. Лекин бу одамни мутлақ худбинликка, фақат ўзининг манфаатини ўйлаб, бошқалар учун яшамаслик иллатига бошламаслиги керак. Зотан, одамзотга шундай неъматлар ато қилинганки, жилла курса, унинг шукрини бажо келтириш учун ҳам ҳақиқий инсонлар ўзини жуда кўп нарсаларда бурчдор ҳис этадилар. Жумладан, камолот оstonасида турган беғубор юракчалар, азиз қоракўзлар тарбиясида ҳам. Ана шу муқаддас бурч, масъулиятнинг меваси бўлган «Вояга етмаганлар ўртасида назоратсизлик ва ҳуқуқбузарликларнинг профилактикаси тўғрисида»ги Ўзбекистон Республикасининг қонунида ҳам бу борада аниқ чора-тадбирлар белгилаб қўйилганки, унга амал қилиш билан ҳар биримиз нафақат ўзимизнинг фуқаролик бурчимизни, балки келажак авлод олдидидаги инсонийлик бурчимизни ҳам адо этган бўламиз.

Қонун фуқаролар, давлат органлари ва бошқа ташкилотлар олдига масъулиятли вазифаларни қўяди. Хусусан, унинг 19-моддаси вояга етмаганлар ўртасида назоратсизлик ва ҳуқуқбузарликларнинг профилактикасида фуқароларнинг ўзини ўзи бошқариш органлари ва нодавлат нотижорат ташкилотларнинг иштирокига бағишланган.

Халқимизда, маҳалланг — ота-онанг, деган нақл бор. Бирорта ҳаракатинг маҳалланг эътиборидан четда қолмаслигини ўйлашнинг ўзи кишига бошқача масъулият юклайди. Бирор айб иш қилиб қўйсам, ота-онам нима дер экан, деган андиша билан улғайган одамларда маҳаллага нисбатан ҳам ана шундай ҳурмат-эътибор, андиша бўлади. Шунинг ўзи ҳам фуқароларнинг ўзини ўзи бошқариш органларининг роли нақадар катта эканини кўрсатади. Хўш, маҳаллалар вояга етмаганлар тарбиясида, улар томонидан содир этилиши мумкин бўлган ҳуқуқбузарликларнинг олдини олишда қандай чораларни кўрмоқдалар? Тошкент шаҳри Учтепа туманида жойлашган «Найман» маҳалла фуқаролар йиғини раиси Олтиной Кенжабоева ўзининг маҳалласи мисолида бу ҳақда шундай дейди:

— Фарзандлар тарбиясида халқимизда ўзига хос йўл тўтилади, — дейди Олтиной Кенжабоева. — Ёшлигимизда уйда ота-оналаримиз, акаларимиз олдидан, кўча-кўйда маҳалладош бобо-бувилар олдидан ўзимизни яхши тутишга ҳаракат қилардик. Кимдандир кичкина айб ўтса, хатони тузатиш ва тақоррламаслик учун катталарнинг уялтириши, нари борса, танбеҳ бериши етарли бўларди. Чунки оқсоқол боболарнинг, нуроний момоларнинг салобати ҳам бор эди-да. Бугун маҳалламизда ана шундай соғлом муҳитни янада қарор топтиришга ҳаракат қилаяпмиз. Шундай ишлар бўлади-

Bolaning begonasi bo'lmaydi

ки, уларни ҳамкорликсиз, биргаликдаги ҳаракатларсиз амалга ошириб бўлмайди. Шу маънода биз маҳалламизда ва туманимизда жойлашган мактабларда мунтазам равишда туман ички ишлар бўлими ходимлари, мактаб ўқитувчилари билан ҳамкорликда тушунтириш ишларини олиб бораемиз. «Оила — маҳалла — мактаб» концепцияси асосида қилинаётган ишларда ота-оналар ҳам фаоллик кўрсатишмоқда.

Дарҳақиқат, юқорида таъкидланган «Вояга етмаганлар ўртасида назоратсизлик ва ҳуқуқбузарликларнинг профилактикаси тўғрисида»ги Ўзбекистон Республикасининг қонунига асосан, юрт тақдирига дахлдор ҳеч бир ташкилот ва ҳеч бир масъулиятли фуқаро бу шароитда бурчдан четда қолмаслиги керак. Бироқ амалда шундай бўлаяптими? Афсуски, ҳамма жойда ҳам ушбу қонун ижроси етарли даражада таъминланаяпти, десак, ўзимизни ўзимиз алдаган бўламиз.

Атрофимизда битта бўлса ҳам ўзининг йўлини тополмай қийналаётган ўспирин, баднафс кимсаларнинг манфаати йўлида ўйинчоқ бўлаётган, нигоҳидан болалик маъсумлиги кетиб улгурмаган, балоғат ва болалик даври аро саргардон қизлар, муштдайлигидан пул, мол-дунё илинжида ота-онаси бағридан узоқларга кетаётган йигитчалар бор экан, биз зиммамиздаги вазифаларни ҳали бажаришга ўзимизни бурчли ҳисоблашимиз керак.

ҲЕЧ КИМ БЕГОНА ЭМАС

Профилактика, жиноятчилик, ҳуқуқбузарлик... Бу сўзларга негадир ҳамон «бегонасираб» қараш одатимиз бор. Жиноятларни фош этиш ҳуқуқни муҳофаза этувчи идораларнинг иши, бунга менинг дахллим йўқ, профилактикани «Камолот» ўзига ҳамкор ташкилотлар билан бирга қилаверсин, мен «Камолот»чи эмасман, деганга ўхшаш фикр, тан олинг, кўпчилигимизнинг хаёлимиздаги гап. Ваҳоланки, биз ўзимиз ва ички ишлар идоралари, қонунни ҳимоя қилувчи ташкилотлар билан бурчимиз, вазифамиз, масъулиятимизда муштараклик бор эканини, иллатларга қарши биргаликда курашиш лозимлигини то англаб етмас эканмиз, иллатларни биз эмас, иллатлар бизни енгиб бораверади.

Дунёни сув босса, балиққа не ғам, деганларидек, мен бир оддий одам бўлсам, кўлимдан нима келарди, бир куни ўтаман-кетаман-да, дея муаммоларга қўл силтасангиз, билингки, сиз кечиршига лойиқ одам эмассиз. Замондошингиз кечирар, яқин-йўлдошингиз, улфатларингиз кечирар, эҳтимол, аммо унутманг, бу лоқайдликни келажак авлод кечирмайди.

Элмурод НИШОНОВ,
«Turkiston» мухбири

Гапингизга заррача ишонмайман. Олдин ҳам мени чув туширгандингиз-а?! Бу энди унисидан ҳам ошиб тушди-ку! Қулоғингиз қалампирдек қизарибдими? Эшитганларнинг энсаси қотаяпти, шекилли. Кўзингиз ҳам би-ир галати рақсга тушаяпти. Юзимга тик боқинг-чи. Вой, вой, вой! Уялманг энди! Тортинмай ростини айтаверинг. Эшитаман...

Биламан. Сиз у эмассиз. Сиз — бу сизсиз. Ширин сўзсиз. Тилингиздан бол томади-я! Баъзида оширворишингизни ҳисобга олмаганда, тузуксиз. Кўз-кўз қилишни жичча ёқтирасиз. Ортиқча бўёқ берасиз-да, ёлгон гапирасиз. Ушанда сиз яхшигина янглишасиз. Тагин гапларимни кўнглингизга олманг. Ўпкалаб, дўстона суҳбатингиздан айирманг. Негаки, сийқаси чиқмаган гапларингизни хўп яхши кўраман.

Ишонасизми, сўзимга ёлгон қўшилса, оёғи куйган товукқа ўхшайман. Типирчилайман. Юзим нақ помидор-

Ростнинг акси

(Замонавий эртақ)

дек қизаради. Сиз-чи? Сиз қандай ҳолатда бўласиз? Юрагингиз тез уради. Танангизнинг қайсидир қисмида оғриқ бўлади. Шундайми? Яшанг. Гарчи ёлгон сўзласангиз ҳам сизда виждон бор. У ҳали ёлгоннинг қурбонига айланмаган. Куюнманг. Ўзгаришингизга вақт бор...

Эшитганмисиз? Ёлгоннинг ҳам жони бор, дейишди. Менимча ҳам шундай. У туғилади, камол топади, яшайди, қарийди ва бир куни албатта...

ЁЛГОН ТУГИЛДИ

— Ойижон, сақич оберинг! Кўғирчоғимнинг қўлини узиб олдим. Ушани ёпиштирмоқчиман...

Ёлгон туғилди. Ўйинқароқ

бола унинг кўзини «очди». Онасининг сақич олиб бермаслигини тушунди. Ва унга эришиш ниятида ёлгонни «дунёга келтирди».

... УЛФАЙДИ

— Устоз, дарс қилолмадим. Кеча роса бошим оғриди. Базўр мактабга келдим. Янаги сафар топширигингизни қойиллатаман. Ишонавринг...

Ёлгон ўсди. Унинг бўйи ўқувчи боланинг шарофати билан чўзилди.

... КАМОЛГА ЕТДИ

— Шаҳноз, хафа бўлмагин! Сал кечикдим-да. Юргин, паррка борамиз.

— Қўйсангиз-чи, Аҳмаджон ака. Ахир, кеча ресторанга

борамиз, дегандингиз-ку?

— Пулим нариги костюмнинг чўнтагида қолибди, Шаҳноз. Тушунсанг-чи.

— Нега пулингиз доим ёнингизда юрмайди? Ёлгонларингизнинг чеки борми, ўзи?..

Ёлгон камолга етди. Йигит ваъдани яхшигина қойиллатди, аммо бажаролмади. Ёлгон ишлатди ва ўзича роса боплади. Юзи шувит бўлганини эса англамади.

... ҚАРИДИ

— Лотореядан машина ютдим. Олдим. Тошкентдан ҳайдаб келаётгандим, пастликка думалатиб олсам бўладими. Пачоғи чиқди. Шундан бўш қўл билан келавердим...

У тўлиб гапирди. Аммо апрофдагиларга бу таъсир қилмади. «Буниси ростми ёки...» дея биттаси луқма ташлади.

Ёлгон қариди. У қадрсизланди. Унга ишонмай қўйишди. Ёлгон ўзининг абадий яшамаслигини тушунди.

Tengdoshlarimga

ЁЛГОН ЎЛДИ

— Ха, ўшанинг гапими? Ўзи нима, сўзи нима! Фирт ёлгончи-ку!..

Ёлгон ўлди. Унинг чин гаплари ёлгон билан қўша кўмилди. Энди у абадий соқовликка маҳкум.

Тўғри, ёлгоннинг ҳам жони бор. Аммо у вужудимиздагина яшайди. Инсонсиз ҳаёт кечиролмайди. Унинг туғилиши, камолоти эса сизу бизга боғлиқ.

Ўйланг, сизнингча, ёлгон иштирокчи ва сабабчилари ким бўлиши мумкин? Ўзига ишонмайдиган, меҳнатдан қочадиган ва ваъдани оғизда бажарадиганлар. Шундайми? Улар ёлгон иштирокчилари-чи? Унақада ёлгон сабабчилари-чи? Фарзандига безътибор, тез-тез койишни ёқтирадиганлар. Шунақароқми ёки худди ўшаларми?..

Нима ҳам деймиз? Сизга яхшиликнигина тилаймиз. Гапимиз ниҳоясида сизга самимий тилагимизни йўллаймиз.

Ёлгон гапиринг. У яхшиликкагина хизмат қилсин. Ёлгон сўйламанг. У ёмонликни етакламасин.

Кумар БЕГНИЯЗОВА

Yarmi hazil...

Эртадан бошлайман

Ёхуд талабанинг навбатдаги иқрорномаси

Эриниб соат саккизда кўзимни очишим билан хаёлимдан ўтган биринчи фикр шундай бўлади: уфф, бугун ҳам дарсга кечикдим. Юз-кўлимни апил-тапил ювганча кечадан қолган бир қултум совуқ чойни нонушта ўрнида хўпларканман, «шип-шип» кийиниб, ўқишга югураман. Кутганда автобус ҳам ҳаяллайди. Кўлимдаги ойлик йўл чиптамга қараб афсус билан бош чайқаганча такси тўхтатаман. Сумкани тескари тутганча аудиторияга кириб келарканман, домламизнинг кўзойнак остидан кулимсираб турган кўзларига танбехли сўзларига бошимни куйи эгиб, қизариб-бўзариб ўрнимга ўтираман ва қатъий аҳд қиламан: «Етар, бўлди, бас! Ҳаммасини эртадан бошлайман. Кечикиб ўриндан туришлар, овчи ўқидан қочган куёндай жонсарак югуришлар, ошқозоннинг оҳларига қулоқ солмай, автобус ортидан қувишлар жонга тегди!».

Шундай ўйлар билан ўтирганимни домла ҳам сездим, шекилли, бирдан бошимга келиб, савол бериб қолса бўладими:

— Айтинг-чи, ўртоқ Аҳмедова, матриархат даврида аёллар қандай ишлар билан шуғулланган?

Ростини айтсам, бугун тарих фани борлиги етти ухлаб тушимга ҳам кирмаган эди. Кўзига термилиб туравердим.

Домланинг тоқати тоқ бўлди:

— Қани, дафтарингизни узатинг-чи.

Бахтга қарши, тарих дафтарининг ўрнига биология дафтари бериб юборибман.

Устоз кўзойнагини ечди-да, мени биринчи марта кўраётгандек ҳайратомуз назар ташлади.

— Нима бало, Аҳмедова, кеча кўрган тушингизни ҳалиям давом эттиряпсизми?

Хонада «гурр» этиб кулги кўтарилди.

Тоза шарманда бўлдим ўзиям. Диванга ёнбошлаб олиб сериал кўргунча, дарс тайёрласам, бу кунлар бошимга тушмасмиди, дейман ўзимга ўзим.

Хуллас, трамвай ойнасидан ташқарига мўлтираганча уйга қайтар эканман, кунига камида ўн марта хаёлимдан ўтказадиган гапимни яна такрорладим: «Етар, бўлди, бас! Мен энди ўзгараман. Ҳаммасини эртадан бошлайман...»

Дурдона МУХТОРОВА

Семестр ҳикмати

Зўр талаба вазифани айтмасанг ҳам бажаради.

Яхши талаба айтганингдан кейин бажаради.

Ёмон... Э, йўғ-е, яхшиликка даъвогар талаба эса...

(Эҳ, шу жойини кимдир йиртиб олибди! Келинг, уни ўзимиз «реставрация» қилиб қўямиз):

— Яхши бўлишга даъвогар талаба ҳам бажаради, ҳаммадан кейин қолиб бўлсаям...

Моттиев домланинг кундалигидан талаба Соттиев ёзиб олди



Якшанба!

Бир курсдошимиз бор. Дарс тугади дегунча, қаерларгадир шошади. Бир кун қарасангиз, Навоий кутубхонасига, бир кун қарасангиз, қайсидир конференцияга. Ҳавасни келтирадигани нима, айтайми? У ҳаммасига улгуради! Ҳақиқий фидойи. Орқаворотдан «академик» деймиз-у, бироқ унга барибир ҳавас қиламиз.

— Шу уйга вазифани бир марта бажармай келсангиз, нима бўлади? Сизни деб бошқалар «жабр» чекапти, — дедим унга бир куни сабрим чидамай.

— Айтилган топшириқни бажармасам, қийналиб кетавераман, нима қилай, — деди у ҳам самимий қилиб. Шу жавобдан кейин нима дердингиз, э, қойил, дейсиз-да тан олиб.

Қаранг, сўраб кўрмабман-у, аммо шундай бўлиб чиқишига шубҳа қилмайман: у якшанба кунлариям фаол бўлса керак. Шу баҳонада тенгдошларимиздан: «Сиз якшанбани қандай ўтказасиз?» деган кичкина сўров ўтказдим. Мана баъзилари билан сиз ҳам танишинг.

Наргиза Бобожонова, талаба:

— Якшанба мен учун ҳақиқий ҳордиқ куни. Ҳафта давомида чарчайман. Югур-югур, ҳали уни қил, ҳали буни қил, курс иши, мустақил иш, семинар... Шундай бўлгач, одам дам олишнинг билиши керак-ку. Аммо шу билан бирга келаси ҳафтадаги ишларимни ҳам режалаштириб оламан. Бу, асосан, куннинг иккинчи ярмида, иложи бўлса, кечроқ бўлади. Унгача, ўқиш ва ишларим ҳақида умуман ўйламасликка ҳаракат қиламан.

Ҳа, «якшанба» мавзуси чексиз... Айниқса, гап талабалар ҳаётидаги якшанбалар ҳақида кетса. Олган жавобларимиз ичида якшанбани «соғинч куни» (бошқа маҳал, масалан, ўқиш кунлари банд бўлиб кўп ўйлашга фурсат кам бўлади), яъни уйдагиларини, ота-онасини, яқинларини соғинадиган кун деб таъриф этганлар ҳам, «компьютер куни» (компьютерда қилинадиган ишларини бажариш куни), «футбол куни» (ҳам ўзлари ўйнашар, ҳам телевизорда томоша қилишди) деб номлаганлар ҳам бўлди.

Ўзинг-чи, дерсиз? Очиғини айтсам, мен учун якшанба — «тўғри хулосалар» куни. Яъни ўтган ҳафтада нималар қилдим, нимага улгурмадим, дея сарҳисоб қиламан ва тегишли хулосалар чиқараман. Камчиликларни тузатиш учун бу энг яхши кун бўлса керак.

Сиз-чи, дўстим, сиз якшанбани қандай ўтказасиз?

Шаҳриёр ЖАЛОЛОВ

Саҳифани ЎзДЖТУ талабалари тайёрлади

Мумтоз куйлар кечаси

Яхши куй, дилкаш хонишнинг инсон руҳиятига таъсири беқийс. Ривоят қилишларича, буюк табиб Абу Али ибн Сино баъзи хасталикларни мусиқа ёрдамида ҳам даволаган экан. Санъатга ошно тутиниш, ёқимли оҳанглари вужуд-вужуд билан ҳис қилишда ҳикмат кўп. Қолаверса, фарзанд тарбиясида ҳам мусиқанинг алоҳида аҳамияти бор.

Мамлакатимизда ёш авлодни миллий истиқлол ғояси руҳида тарбиялаш, уларнинг қалби ва онгида ватанпарварлик туйғуларини шакллантиришда мусиқа алоҳида ўрин тутди.

Талаба-ёшларимизни кўшиқ санъатида ўзининг мустақкам ўрнини топган, эл назарига тушган санъаткорларимиз ижоди билан яқиндан таништириш, шунингдек, ўзбек миллий чолғулари ранг-баранглиги, ижрочилик имкониятлари бойлигидан хабардор этиш мақсадида Тошкент давлат юридик институти ва Ўзбекистон Республикаси Мудофаа вазирлиги Марказий

офицерлар уйи ҳамкорлигида Муҳиддин Қориевқубов номидаги академик ва халқ бадийи дирекцияси қошидаги «Мумтоз» ашула ансамбли раҳбари, Ўзбекистон халқ ҳофизи Ўлмас Саиджонов, ўзбек мумтоз ашулаларининг моҳир ижрочиси, Ўзбекистон халқ артисти Муножот Йўлчиева, Ўзбекистонда хизмат кўрсатган артист Зариф Азизов, хушовоз хонанда Гулсара Фоипова ва бир қатор эл назарига тушган санъаткорлар билан учрашув ўтказилди.

Тошкент давлат юридик институти профессор-ўқитувчилари, талабалари



ҳамда ҳарбий билим юрти талабалари иштирок этган ушбу тадбирда куй ва кўшиқлар билан бирга, Ўзбекистон халқ ҳофизи Ўлмас Саиджоновнинг «Мумтоз куй — миллий қадриятимиз», Ўзбекистонда хизмат кўрсатган артист Ўткир Сиддиқовнинг «Ўзбек чолғу асбоблари оҳанглари», ТДЮИ ижтимоий-гуманитар фанлар кафедраси

доценти Раҳмон Кўчқорнинг «Ёшлар эстетик дидининг юксалишида миллий санъатнинг аҳамияти» мавзуларида қилган чиқишлари ҳам зўр қизиқиш билан тингланди.

Хулкар ОРИПОВА,
ТДЮИ маънавият-маърифат ва иқтидорли талабалар билан ишлаш бўлими ходими

Nafis tuyg'ular

НИЛУФАР

*Севги ёш танламас, танламас миллат,
Уммондек тилсим — бу чексиз муҳаббат.
Юрагимиз дилкаш, туташдир балки,
Не ҳам дердим сизга талпинсам фақат.*

*Юрак талпинади, чекарман озор,
Сиздан сўролмасман ортиқча ҳиммат.
Нигоҳлар тўқнашса, забундир дилим,
Ажиб асроринг бор сенинг, муҳаббат.*

*Севиш осонми ё севилиш осон,
Ҳижрон чидаб бўлмас ачиқ ҳақиқат,
Чиндан ҳам йўлимиз айродир, айро,
Нилуфар — осмонда ёнган муҳаббат.*

*Умидларим сизга боғланди нетай,
Юрак йўлингизни излаган бўлсам.
Севинчдан юрагим сел бўлиб кетди,
Нетай ишқингизда хокисор ўлсам.*

*Ул Тоҳир ишқида гўёки Зухро,
Содиқ ёр излаб мен вафо топмадим.
Нилуфар — осмонда ёнган муҳаббат,
Ишқдан ўзга сендан жафо топмадим.*

ТЎРТЛИКЛАР

*Сенинг қийноғингдан қийналди қалбим,
Лабинг тафти билан алданди юрак.
Бунча азобладим ўзимни-ўзим,
Куйган дудогимга куйик на керак?*

* * *

*Дунё кўзларимга кўринди тордек,
Ҳуссалар жуссамга битилган тилак.
Азоб айвонида қолиб кетганим,
Тақдир жазосидан фақат бир бўлак.*

* * *

*Тилни-да ҳар кўйга солишинг мумкин,
Юрак алдармиди, тил алдамаса.
Дилни алдаб бўлмас, сен мени тушун,
Муҳаббат боғида олов бўлмаса.*

ОНА ОМОН ЭКАН

*Кулсам кўзларимдан қалқиб чиқди ёш,
Кулсам-да, йиғласам бор сабр-бардош.
Ичимда айтарга сирим кўпайса,
Онамдир мен учун ягона сирдош.*

*Барча қизлар сизга ҳамроҳдир, она,
Сукунат қалбимни ўртар ягона.
Томчиға қадалган нигоҳим ўтинч,
Она омон экан — фарзанд уйи тинч.*

*Қалби буюк, кўкраги тоғдир онам,
Дунё кўрган фарзандга тоғдир онам.
Карвонимсиз, ўй-хаёлим эрта-кеч,
Она омон экан — фарзанд уйи тинч.*

Гулбахор ЖАББОРОВА

Menga so'z bering

Қадриятимиз, бойлигимиз

Узоқ тарихи, миллий адабиёти, маънавий бойликлари бўлмаса, миллат миллат, халқ халқ бўлмайди. Ундай юртни буюк юрт дейиш ҳам мумкин эмас. Минг йиллардан буён халқ тилидан тушмай келаётган улғувор дostonлари бўлган элни буюк эл деса бўлади, илдизи мустақкам, узоқ ўтмишга эга юртларни улғу юрт деса бўлади. Шукрки, бизнинг ана шундай қадим маданиятимиз, эзгуликка тўла, соҳир дostonларимиз бор. Улардан бири «Алпомиш» дostonидир.

1999 йилда ўзбек адабиётининг етук намунаси «Алпомиш» дostonининг минг йиллиги кенг миқёсда нишонланди ҳамда ЮНЕСКО ташкилоти томонидан эътироф этилди.

Дostonни ўқиганлар агар жаҳон адабиётидан ҳам яхши хабардор бўлсалар, худди унинг каби машҳур «Одиссея» дostonи билан баъзи жиҳатларда ўхшаш эканини пайқашлари мумкин. «Одиссея» ва «Алпомиш» дostonлари сюжетида яқинлик кўринса-да, лекин асардаги қаҳрамонлик идеаллари бир-биридан фарқ қилади. Қадимшунос олимларимиздан бири таъкидлаганидек, бу асарлар ўртасидаги яқинликни фақатгина бизнинг юртимиз билан қадимги Юнистондаги ижтимоий ҳаётнинг маълум тарихий шароитларда бир-бирига яқин бўлганлиги билан изоҳлаш мумкин, холос. Бу ҳам бўлса, гайритабиий бир ҳодиса бўлмай, балки инсоният азал-азалдан эзгуликка талпиниб яшагани, бинобарин, халқлар турли тилда гаплашгани, турли жойларда яшагани билан уларнинг юраги бир хил экани, орзу-армонлари бир-бирига муштарак эканини билдиради.

Ҳар икки дoston ҳам воқеалар тизими жиҳатидан ҳамда мазмунан бир-бирига жуда яқин. Жаҳон адабиётида ўзининг муҳим ўрнига эга бу икки асар пировардида улкан маъно касб этади. Бинобарин, қаҳрамонлар характеридаги ватанга муҳаббат ҳислари асарда асосий ўринни эгаллайди. Қолаверса, икки асар ҳам қаҳрамонлик дostonи бўлиши билан бирга, ўзида ватанпарварлик, ота-онага ҳурмат, дўстга садоқат, вафодорлик, мардлик, сабр-матонат, меҳр-оқибат ва муҳаббат каби эзгу ғояларни мужассамлаштиради. Ушбу дostonлар мукамал асарлар сирасига киради ва жаҳон адабиётининг нодир дурдоналари бўлиб қолади.

Сайёра ЗУПАРОВА,
ЎзДЖТУ талабаси



Антиқа ёрдам

Шотландиянинг Аллоа шаҳри портларининг бирида хизмат қилувчи юк машина ҳайдовчиси қирғоқдан узоқликка келиб қолган, кучли бўронда қолиб кетган тюлень боласига ноанъанавий тарзда ёрдам кўрсатди.

Жониворни топиб олган ҳайдовчи дарҳол уни машина юкхонасига солиб кўяди. Унинг бу қарорга келишига эса, денгизда бўлаётган кучли тўфон сабаб бўлди. Ўзи ҳайвонларни ҳимоя қилиш марказига хабар беришга ошиқади. Бу вақтда зериккан Смартти (унга шундай лақаб қўйишган эди) мустақил тарзда ўлчовлар панели устига, яъни пешойна ёнига чиқиб олади ҳамда кўчада бўлаётган бўронни томоша қилади. Марказ ходимлари келганларида тюлень боласи мириқиб ухлаб ётган эди. Ҳозирда уни тутқунликда сақлашмоқда. Агар тиббий кўриқдан муваффақиятли ўтадиган бўлса, денгизга қўйиб юборилиши мумкин.

Қидирувдаги тошбақа

Бразилиядаги оилалардан бирининг хонадонидеда ўттиз уч йил аввал йўқолган тошбақа электр буюмлар сақлаш омборидан топилди.

Маълумотларга қараганда, ноёб турга мансуб бўлган бу тошбақа 1980 йилда уйни таъмирлаш вақтида йўқолади. Эгаси Леонел Алмейда уни жуда яхши кўрар, ҳаттоки Мануэл дея лақаб ҳам қўйган эди. Афсуски, Леонел вафот этганидан сўнг бир неча йил ўтиб тошбақа топилди. Жонивор бир уюм темир ускуналар ичида термитлар, яъни майда ҳашаротлар билан озикланган деган тахминлар бор. Деразанинг «терлаши» натижасида томадиган сувдан чанқоғини қондирган бўлиши мумкин. Ветеринар эса, тошбақани кўздан кечирар экан, тошбақалар йиллаб ҳам очликдан ўлиб қолмаслигини айтиб ўтди.

Қўғирчоқлар салтанати

Тайваннинг ўйинчоқлар ишлаб чиқарувчи «Маттел» фирмаси Тайбэй шаҳрида ажойиб кўринишга эга бўлган ресторан очди.

Бу масканда шу вақтга қадар ўзга ресторанларда учратмаган кўринишни учратиш мумкин. Яъни ресторан тўлиқ қўғирчоқлар билан безатилган. Ҳатто идишлар ҳам худди ўйинчоқ идишлар кўринишини эслатади. «Barbie restaurant» дея ном олган бу жойнинг асосий меҳмонлари ота-онаси билан келаётган ёш болалардир. Айни пайтда қўғирчоқлар салтанатига Хитой ва Япониядан ҳам меҳмонлар ташриф буюрмоқда. Ресторан ходимлари меҳмонларни турли хил — рецепти сир тутиладиган, ўзгача услубда тайёрланган таомлар билан сийлашмоқда.

Интернет манбалари асосида
Жавоҳир КАРОМАТОВ тайёрлади

Javohir

Алишер Навоий

(Қитғалар)

Қўп олгун, қумуш сори қўл сунмоғил,
Ки тутсанг кафингни қаро ранг этар.

Қўнгулда доғи майлини асрама;
Ки қўнглунгни доғи ҳамул ранг этар.
* * *

Ато ҳам турфа ишдур турфароқ бил,
Агар йўқтур анинг ёнида миннат.

Ҳаким инсони комил дебтур ани,
Ки бўлғай зотида бу неча хислат.
* * *

Сув бирла ўт аро зиддият ўлди чун азалий,
Агар ҳаёт суйидурки, ўтқа офат эрур.
* * *

Жаҳон ганжиға шоҳ эрур аждаҳо,
Ки ўтлар сочар қаҳри ҳангомида.

Анинг коми бирла тирилмак эрур,
Маош айламак аждаҳо комида.



Пойтахтимизнинг Чилонзор туманида жойлашган Тўхтасин Жалилов номидаги 6-болалар мусиқа ва санъат мактаби ёш иқтидор соҳибларини кашф этишда ўзига хос тажрибага эга. Мактабда болаларнинг қизиқишларига қараб санъатнинг турли йўналишларида маҳоратли устоз-мураббийлар сабоқ беришади.

СУРАТДА: мактаб ўқитувчиси Лидия Шестакова шогирди Комила Жалоловага пианино чалишни ўргатяпти.

Сардор МУЛЛАЖОНОВ фотолавҳаси

YON DAFTARCHANGIZGA

Ватан учун чала иш қилиш унинг учун ҳеч нима қилмасликдир.

Максимилиан Робеспьер

	Навоий ҳоким бўлган шаҳар	Асло, сираям	Тенгсиз, баҳоси йўқ	Жавоҳар-лал ... (хинд арбоби)	...-наво (товар баҳоси)	Синҷбоп ёғоч		
	Сигал (актёр)	Сирли учбурчак						
				Жуда (шева)		Сайёра номи (Миррих)		
Суяк ёғи	Инсон «мотор»и	Хўжайин, бошлиқ	Хона			Гуллар «шоҳ»и	Самолёт зинаси	Учрашув, висол
	Бунёд, яратиш			Космик тош				
Кўплик қўшим-часи	Афсус, пушаймон	Тунги хордиқ				Новвойнинг ёнғачи	Билан	Ижод маҳсули
Тўтиқуш тури	Кўпроқ, кўпинча	Бафур-жа, шошмасдан				Соқол киртиш-лаш асбоби	Анжелес (шаҳар)	
Туман, (Наманган вилояти)	Райхон, Беруний					Ёвуз, баттол	Туполев самолёти	...-воҳ, нола
		Яқун, интиҳо				Тақдир	Овчининг иши	ажабо!
Бокс «тайм»и	...эгасини топади		...плюс (газета)	Худой-шуқуров (хофиз)	Ҳамиша, ҳамма вақт	Табийи канал, сой		
						Ҳаё		
	Олди-сотдини тасдиқ-ловчи юрист		У ким? ... нима?	Кўрса-тиш олмоши	...-гаплар			
					Сингари, ўхшаш			
	Кураш-даги ҳолат	Кут-барака, ривож			От боласи			

Тузувчи: Фахриддин Раҳимов

Sport

Муҳим ўйинлар олдида

Кеча Тошкент вақти билан соат 19.00 да Бирлашган Араб Амирликларининг Дубай шаҳрида футбол бўйича Ўзбекистон ва Озарбойжон миллий терма жамоалари ўртасида халқаро ўртоқлик учрашуви бўлиб ўтди. Бу жаҳон ва Осиё чемпионатлари саралаш учрашувларига тайёргарлик доирасида Миржалол Қосимов шогирдларининг БААдаги сўнгги учрашуви бўлди.

Назорат-синов ўйини бўлса-да, ҳар иккала жамоа ушбу ўйинга жиддий қараганини уларнинг асосий футболчилари билан майдонга тушганидан ҳам билиш мумкин. Футболчиларимиз UEFA вакили саналмиш жамоага қарши ўзларининг энг яхши жиҳатларини намойиш этишга ҳаракат қилишди. Бироқ ўйинда на юртдошларимиз, на рақиб жамоа вакилларига гол уриш насиб этди. Тенг курашлар остида кечган ўйин 0:0 ҳисобида яқунланди.

Бугундан бошлаб терма жамоамиз навбатдаги саралаш учрашувларига Тошкентда ҳозирлик кўради.

Холжигит ОРТИҚБОЕВ,
ЎЗМУ талабаси

Turkiston

МУАССИС:

«КАМОЛОТ»

ЁШЛАР ИЖТИМОЙ ҲАРАКАТИ
МАРКАЗИЙ КЕНГАШИ

Газета Ўзбекистон
Республикаси
Матбуот ва ахборот
агентлигида 2007
йил 19 апрелда
№ 0242 рақам
билан рўйхатдан
ўтган.



Бош муҳаррир:

Ашуrow Салим Тўраевич

Тахрир хайъати:

Баҳодир Фаниев, Меҳриддин Шуқуров (бош муҳаррир ўринбосари — «Turkiston»), Элмурод Нишонов (масъул котиб — «Turkiston»), Ирина Кочергина (бош муҳаррир ўринбосари — «Молодежь Узбекистана»), Елена Калинина (масъул котиб — «Молодежь Узбекистана»), Рустам Қосимов

Навбатчи муҳаррир:

Умарова
Наргиза
Баҳодирова

Саҳифаловчи:

Рўзиев
Зафар
Хусанович

Газета тахририят компьютер
марказида терилди ва
саҳифаланди.

Манзилмиз: 100083, Тошкент,
Матбуотчилар кўчаси, 32.

Телефонлар: (371) 233-95-97.
Реклама бўлими: (371) 233-79-69
e-mail: turkiston@sarkor.uz

«Шарқ» нашриёт-матбаа акциядорлик
компанияси босмаҳонасида, А-3 форматда
чоп этилди. Ҳажми — 2 босма табоқ.
Корхона манзили: «Буюк Турон» кўчаси, 41.

Буюртма Г-143.
Адади — 15287

Босишга топшириш вақти — 21.00
Топширилди — 22.30
ЎЗА яқуни — 21.00

Офсет усулида босилган.

1 2 3 4 5 6